

Na a la cassa unitara – gea a la gulivaziun

La pcd ha prendì las parolas e la fracziun ha orientà

■ **(anr/gc) Be 65 delegadas e delegads han prendì part a Cuira la gievgia da la radunanza da la Partida cristiandemocratica (pcd) dal Grischun.** Igl è stà l'emprima scuntrada sunter las elecziuns chantunales da questa primavera. Il parsura, cuss. dals stans *Stefan Engler*, ha perquai laschà passar revista talas en ses oraifer ed extendì pled d'introducziun.

Ina bilantscha maschadada

Fitg legraivel è l'onurific resultat da la reelecziun da cuss. gov. *Mario Cavigelli* cun pli che 32 000 vuschs. Ina evidenta reconuschientscha per sia buna politica. Main positiva è la bilantscha da las elecziuns en il cussegl grond. Bain resta la pcd cun 31 mandats la segunda ferma fracziun, ha dentant sperdì dus mandats. En quatter cumins hai dà sperditas ed en dus gudogns. La delegaziun è dentant vegnida en la media pli giuvna.

Las partidas circuitalas ston s'engaschar dapli e procurar per ina basa activa. En gnanc tant ditg vai per las elecziuns naziunalas nua che la pcd duai defender persula ses sez a Berna – e quai cun temas enstagl placats e cun dapli curaschi da ristgar. Il parsura ha anc tangà e commentà problems e fatgs che ston er occupar la partida.

Sa regurdà èn ins da dus meritaivels defuncts: Dietmar von Blumenthal, Rotten, era stà president da la pcd grischuna, e dad Otto Dosch, s'engaschà fitg per la pcd dal cumin da Curvalda.

Tuts cunter ina cassa da malsaus unitara

Stefan Schena, president da la direcziun da la Cassa da malsaus publica (CMP) dal Grischun, dilucidescha l'intent da

l'iniziativa federala per ina cassa da malsaus unitara. El è cunter. Insatgi che vess discurre persunter n'han ins betg chattà.

Las retschertgas e prognosas enconuschentas na dattan betg buns aspects a questa iniziativa – sco gia succedi duas giadas pli baud. Quella empermetta d'esser pli favuraivla, gista e cun main custs da reclama. I dess be pli ina cassa per chantun che remplazzass las 61 cassas da malsaus existentas cun lur bleras agencuras. 95% èn custs medicinals, be 5% necessari per l'administraziun. La midada custass 2,6 milliardas. Vitiers vegn anc ch'in monopol na saja betg innovativ. Il sistem vertent è bun, dentant d'adattar. A la midada da quel èsi da dir na. Tala fiss in debachel. Tut vegness pli char e la qualitat mendra.

Unanimamain di la pcd na a la cassa da malsaus unitara. Pertutgant l'iniziativa «Far fin a la discriminaziun tar la taglia da plivalur en la gastronomia» ha la suprastanza decidì in gea.

Refurmar la gulivaziun da finanzas

Deputà *Hans Geisseler*, Vaz-sut, preschenta la lescha pertutgant la refurma da la gulivaziun da finanzas en il Grischun. Sin plaun federal exista ina tala dapi 2008. Il Grischun l'ha refusà 2010. Il cussegl grond ha dentant elavurà ina nova lescha. Encunter quella è vegni lantschà il referendum tras vischnancas fermas. La finimira è dad eliminar las mancanzas cun differenziar tar la finanziaziun tranter las vischnancas. I va per gulivar anc dapli tar ils custs ed ils burdis spezial ed uschia sminuir las differenzas. Las vischnancas flavilas vegnan distgargiadadas per ulteriurs 22 milliuns tras il chantun.



Il president da la pcd grischuna, cuss. dals stans **Stefan Engler**.

FOTO G. CAPAUL

La nova lescha da gulivaziun da finanzas è faira, transparenta e fa il Grischun pli fit per l'avegnir tras eliminar mancanzas dal sistem vertent. Unanimamain vegn perquai decidì la parola gea.

La fracziun metta accents

Il schef da la fracziun cristiandemocratica en il cussegl grond, *Marcus Caduff*, preschenta ils novs otg deputads e gratulescha al gist elegì viceparsura dal cussegl grond *Vitus Dermont*. La fracziun saja daventada pli virila e giuvna. Alur dilucidescha el ils accents principals da la politica che la fracziun ha prendì en vista da realisar la proxima perioda da legislatura.

Quai è ina giada la politica economica ch'ins vul promover cun ina lescha per il svilup che tegna quint da las differenzas tranter centers e regiuns. Il lieu d'economia grischun sto vegnir rinforzà. Er in nov concept per il spazi è necessari.

Sin il champ da la scolaziun e furmaziun sa tracti da reveder la lescha per las scolas medias en il chantun ch'ins less rinforzar, spezialmain en la regiuns, cun sa gidar finanziaimain. Pertutgant l'iniziativa da linguatgs ha la pcd ina clera optica per noss chantun triling, medemamain quai che pertutga il Plan d'instrucziun 21 nua ch'ins less oravan tut era reguardar valurs cristianas.

Pertutgant l'energia èn las vischnancas confruntadas cun il return a tschep da las ovras idraulicas. Sin quel sector è il squitsch grond en vista internaziunala a la midada d'energia. – Il Grischun ha saunas finanzas. Tuttina èsi da sa dar fadia cun restrenscher las expensas e na reducir las taglias. Quai purtassia avantatgs be a curt termin.